

Mazarin
3667

Le sesanus romain au roy...

UNIVERSITY OF N.C. AT CHAPEL HILL



00023010634

RARE BOOK
COLLECTION



THE LIBRARY OF THE
UNIVERSITY OF
NORTH CAROLINA
AT
CHAPEL HILL
Mazarin
3667

17
3667

3667 20

LE
SESANVS
ROMAIN
AV ROY,
OV
L'ABBREGE' DES
CRIMES
DV PROSCRIPT
MAZARIN.

A PARIS,

M. DC. LII.

13
30

LE

SESSANS

ROMAIN

AV ROY

OV

FABRICE DES

CRIMES

DA PROSCRIPT

MAZARIN

A PARIS

M DC LII

L E
SESANVS ROMAIN
AVROY.

OV L'ABBREGE' DES CRIMES
du prosript Mazarin.

LEs rigueurs, les cruautez, les tyrannies, les assassinats, les empoisonnemens, les raptz, les sacrileges, les accusations, les proscriptions, les iniustices, les seditions, les partialitez & les guerres. Bref, les feux & les flammes dont l'Empire Romain a esté embrasé sous le regne de Tibere, n'ont iamais peu estre arrestées, suspendues ny esteintes, que par la mort de *Sesannus Iustinianus* fatal boutefeu, & le flambeau des malheurs, qui ont presque reduit en cendre ceste premiere Souveraineté du monde.

SIRE, voici l'estat present des affaires de vostre Royaume, en voici la viue image, il y a dix ans que *Sesannus* a porté son demon dans la France, sous le regne de **LOVIS XIIII.** vostre Pere, il s'y est establi en hypocrite, en regnardeau, & ce grand Prince qui cherissoit ces Princes, qui aimoit ses suiets commençât à le cognoistre, commençoit aussi à le hayr, & auoit re-

folu de purger ses Eſtats, & en chaffer ceſte peſte publique.

Mais ſa mort funeſte & precipitée, en ayant arreſté l'exécution, à voſtre minorité, les diuiſions que ce nouuel *Sesanus* à ſemées dans voſtre Eſtat, & l'auctorité qu'il s'y eſt uſurpée, luy ont mis la couronne ſur la teſte, nous ont fait eſclaues de ſes deſirs, & de ſes paſſions déreiglees, & l'y font regner en Lyon deuorât.

Nous ne viuons depuis cinq années que de larmes, ſurchargez de tant d'impoſitions extraordinaires, foullez de tant de nouuelles commiſſions & d'Edicts de creation d'offices, opprimez de tant de leuees de deniers, bref ſi tyrannifez par ce nouuel *Sesanus* qu'il ne nous reſte plus de vie, non pas même pouuoir & la liberté d'exaller ces dernières paroles.

Nos Princes ſont empoisonnez, ſont emprisonnez, ſont chafſez d'aupres de leurs Princes, ſont courus, on leur liure la guerre, on leur interdit l'entrée des villes, & veut-on faire croire que la requeſte à l'inſtant qu'ils font de la reformation de l'Eſtat, que la iuſtice qu'ils demandent à V. M. des maluerſations de ce nouuel *Sesanus*, & ſes ſuppoſts, eſt vn crime de leze Maieſté.

Le Parlement, cet auguſte Senat de la Iuſtice des Roys, ceſte Cour des Pairs, la ferme coullonne de voſtre Couronne eſt menaſſée de mort, de priſon perpetuelle ou d'exil, ſi elle continue en ſes tres-humbles remonſtrances, ces vieux & fidelles ſeruiteurs n'oſe-

roient

172082

roient plus parler, il n'y a plus de liberté que pour les pensionnaires, vos tres-humbles seruiteurs, vos fideles fuiers sont enleuez de leurs maisons, de leurs lits, lors mesme qu'ils n'ont plus presque de vie en extremité de maladie, & conduits par la ville de Paris, par vne insolente trouppes d'archers, sont arrachez d'entre les bras de leurs femmes du corps du Parlement, & renfermez dans des prisons.

La Noblesse qui se joint avec ceste sainte demande est declarée rebelle, on propose de l'assassiner on la prescripte de la France, & le tiers estat est menacé de fers & de prison, la parolle mesme est interdite aux gens de bien qui s'en pourroient plaindre, & mes-huy la France deuient vne forest sans Princes, sans hommes, & sans François.

Si ta cruauté *Sesanus* n'est encore assouvie du sang, & de l'honneur de ceux que tu as fait mourir & mal traicter pour auoir leur bien & confiscation, si ton avarice n'est encore bornée des grands tresors que tu as vollez à sa Majesté & à son peuple, qui te font seigneur de deux cens milli liures de rentes, en Benefices, & de plusieurs millions d'or en deniers contans, si ton ambition desmesurée n'a encores du tout esloigné nos Princes, & esteint la memoire de leur nom, pour commander apres absolument en France, & y trancher du souuerain, si tu n'as du tout opprimé ou aboli la iustice souueraine en nos Roys qui se plaignent de tels mauuais deportemens, si le sceau, le Conseil de sa Maieité & les finances de cet Estat ne sont en-

cores assez ruinées, bref, si le peuple qui reuere son Roy, si la Noblesse qui le soustient a encore quelque chose de reste qui puisse empescher l'effect de tes desirs.

Cruel tyran, *Sesanus* nostre ennemy commun, faicts nous tout a faict mourir, sans nous faire languir, ne nous traine plus en esclaves apres tes passions, tranche toutes remises, & aduance promptement le cours de nos malheureuses destinées, aussi bien nous sommes François, & voulons ou la mort pour ne souffrir plus tes cruautés: ou la vie pour defendre celle de nos parens.

Grand Dieu moteur de cet vniuers, qui sondez les cœurs & les pensées des hommes, ayez pitié de ce pauvre Estat du tout perdu, sauuez nostre Roy, maintenez les Princes & le grand corps souverain de Iustice, & nous donnez la force de tellement combattre l'ennemy des fleurs de lis, qui demeurans dans l'integrité de nos peres nous chassions ce nouuel *Sesanus* & sa tyrannie, nous fassions voir à la posterité que nous auons encores assez de courage & de force pour maintenir nostre Roy, les droicts de sa Couronne; & la iustice la deffendre de l'inuasion de ses ennemis; & empescher l'audace & insolence de tous ceux qui s'y voudront rendre contraire.

SIRE, les larmes de vostre pauvre peuple n'ayant peu estre veuës des tendres yeux de V. M. ny leurs soursirs & voix mourantes ouyes de vos ieunes oreil-

les, souuent toutesfois paruenües iusques à vostre chambre, souuent représentées à vostre Conseil, tousiours mesprisées par ce nouuel *Sesanus* qui y preside, ce grand Roy des Roys les a en fin exaucées, & parmy ce grand desordre, au milieu de nos fers, dans l'abandon & la licence du vice, à la veille de nostre perte, a inspiré la volonté de S. A. R. de les faire connoistre, & les vous représenter.

Car qui veid iamais Maiesté si mal suiuiue, les Princes & grands si peu respectez, la Iustice si mal administrée, vos finances si ruinée, la Noblesse si fort mesprisée, le peuple si opprimé, les charges & dignitez si mal départies, les benefices si mal pourueuz, les offices à si haut prix, & la Couronne en si grand hazard.

Mais SIR E, ceste belle esperance que nous auons conceu s'est esvanouie, l'assurance que nous auons prise, & quelque reformation est demeurée vaine, & ne nous en reste que le seul desespoir.

Temistocles voulant leuer par force la cruë des tailles sur les Adriaux, leur fit entendre qu'il leur apportoit deux puissans Dieux, amour & force, mais ils luy respondirent qu'ils en auoient encores deux plus puissans, sçauoir pauvreté & impossibilité.

Hé qui ne s'est point plainct de ces charges, vostre Maiesté l'a veu par la declaration que la Noblesse en a faictes & portées, non par deux ou trois de ce corps; mais par plus deux cens qui ont protesté de la

8
soutenir à la poincte de leur espée, attendant que
vostre Maiesté leur en aye fait iustice.

Le Parlement s'en est scandalisé, & s'estant veu
mal traicté pour avoir bien seruy, soustient les
droicts de vostre Couronne, la liberté & seureté de
vostre personne vous a déclaré, qu'il ne pouvoit
plus supporter le faiz de si dures & pesantes charges,
& les deputez de cet ordre vous ont assez tesmoigné
& adverty qu'ils ne pouvoient retourner chez eux en
assurance de leurs personnes, si vostre Maiesté ne
les contentoit de ce qui leur a esté promis, & dont
lettres ont esté escrites & envoyées aux Provinces.

Mais tout cela n'a seruy d'aucune chose sur l'inhu-
manité de *Sesanus* contre les mauvais desseins, vostre
Parlement en fin a pris partie du malheur de la Fran-
ce, & continuant à l'endroict de vostre Maiesté la fi-
delité & devotion dont il a esté de tout temps admi-
ré avoit ouvert la porte aux remedes, & par son arrest,
qui porte semonce aux Princes & grands du Royau-
me de se rendre au Palais, esperant de servir vostre
Maiesté si puissamment, si vtilement, & avec tant
de gloire que vostre regne en eust esté beny de
Dieu & des hommes, & estoit ceste action si glorieu-
se & si grande qu'il en eust esté memoire, à jamais.

A cela vos mauuais Conseillers, les mauuais Fran-
çois opposent que c'est entrepréde sur vostre aucto-
rité que le Parlement ne doit connoistre des affaires
d'estat, comme si c'estoit chose nouvelle, & dont on
fut

fut sans exemple dans l'histoire, que le Parlement représente à son Roy, ce qui regarde le bien de ses affaires, & les desordres de son Conseil, comme si en l'année quatre vingts dix-sept, le mesme Senat n'avoit pas fait le semblable à l'endroit de Henry IV. estant lors à Fontaine-bleau.

On met la Roynie en ceruelle, on ne veut point que ceste assemblée se face, & deslors *Sesanus* qui voit ses actions descouvertes, sa vie reconnüe de tout le monde, qu'on trouue des promesses faictes pour luy, à la charge d'expedier & faire des arrests du Conseil, que son honneur est perdu; & que son bien & sa vie courent risque, destourne l'effect d'un si avantageux & honorable dessein, donne l'alarme bien chaude, & fait sonner le toxin contre vn corps de Justice, fidel & tres-obeyssant.

Ce Parlement est menacé, on a veu ses remonstrances, elles vous sont présentées, elles ont esté leuës en plain Conseil, mais la responce n'est que menaces, la satisfaction que le mespris & le bon gré de se service, que deffences de passer plus outre.

On fait plus cas de *Sesanus*, que de ce tant renommé Senat, il y en a qui publiquement oppinent à la mort de quelques-vns, comme des Presidens & Conseillers de ce grand Corps, on les menace en vostre presence, & dès lors l'on minutte des arrests fulminez, pleins de passion, violence & de rage, on nomme leurs remonstrances, calomnies & rebellions,

que c'est vne entreprise sur vostre autorité, contre leur deuoir & le bien de l'Estat, bref, on les accuse de crime de leze-Maiesté, avec des paroles pleines de rigueurs & de chastimens.

On se saisit de la personne de Messieurs les Princes, on fait aduancer les compagnies d'Ordonnance, & les cheuaux legers, on les conduit au Bois de Vincennes, de là à Marcoucy, & apres au Hivre de Grâce pour les perdre, & la peau du Lyon ny pouuant faire aucune chose, on y attache celle du Renard: apres leurs deliurances on veut conferer avec eux, pour pouruoir à ce desordre, & en chercher le remede, mais pendant qu'on les amuse sur ce traicté, on minutte à les arrester encore vne fois, & ayant aduisé qu'il n'y auoit point de seureté pour eux, ils cherchent leurs seuretez en Guyenne & en Normandie.

Vn certain Empereur fit venir à Rome Archelais sous feinte d'amitié, l'accusa, l'arresta, & le fist mettre en prison, le fit mourir, & rendit son Royaume tributaire à l'Empire Romain.

Et qui ne voit que *Sesanus* qui ayme la confusion & le desordre, iugeant que certe reconciliation estoit le seul acheminement des affaires, & que l'eschet en tomboit sur sa teste, l'a voulu rompre, rendre inutile, & qui ne cōnoist que leur ancre sacrée, leur refuge & leur salut ont esté de recourir à Monsieur le Duc d'Orleans, & le coniuurer par leurs dignes & signalez ser-

uices que chacun scait de ne les abandonner en vne occasion si importante & si necessaire, & persuader la Royne de permettre de donner les seuretez qu'ils demandent pour reuenir en Cour.

Cesar craignant de rendre compte des charges qu'il auoit eues s'empara de l'Estat & se fit souuerain, & Pericles ietta le peuple d'Athenes à la guerre pour le mesme sujet: ainsi fait *Sesanus* lors que l'on parle de la recherche de sa vie, il arme tout l'Estat, & veut la guerre.

Car il a bien consideré que le gouuernement de Paris, que le Bois de Vincennes ny autres forteresses n'estoient assez fortes pour asseurer sa vie contre la haine generale & publique que la France a conceuë contre luy: car de penser qu'un tyran se puisse garantir par force, c'est vn abus, tesmoins les Empereurs Romains, qui ne laissoient d'estre assassinez encores qu'ils eussent quatre legions d'ordinaires près de leurs personnes seuls, pour estre maintenus.

Vostre Maiesté a veu par la lettre de Monsieur le Prince & par sa declaration, la tres-humble soubmission de l'obeyssance qu'il apporte à ce qui est de vos commandemens, il ne vous demande ny argent, ny honneur, ny dignitez, ny recompense, ny places fortes, ny aucunes choses pour son particulier, comme ses ennemis publies, & que l'on a fait escrire par toute la France sous le nom de vostre Maiesté, son vniuebut est vostre seruice, & pour son affection le bien.

de vostre estat. Il ne crie que iustice & vous la demandez tres-humblement contre le tyran Sejan, avec le soulagement des oppressions que le peuple souffre & nous adioustons à ces instances contre tant de proscriptions & violences faites à des personnes de qualité, & recommandable pour leurs grands seruices & louïable fidelité, qu'ils ont tesmoignée à vostre Maïesté, & à la conseruation de cet Estat, & que veu la iuste innocence de Monsieur le Prince, & des Princes & Ducqui l'assistent.

Et pour cela, faut-il que *Sesanus* vous porte à la guerre, qu'il embrase les quatre coins de vostre Royaume, & qu'il le mette en cendre, faut il Sire, que pour quelques personnes vn monde d'ames perisse, vos villes seruiuent & que la France deuienne vne forest. Quoy? pour cela faudra-il exterminer la maison de France, & sous des colonnes de *Sesanus* auctorisée de vostre seau, & de tant de Declarations faite par le Conseil de ses pensionnaires, perdre vostre sang & vos subiects.

Quoy? parce que Monsieur le Prince & les autres Princes qui l'assistent, ne respirent qu'à rendre tout seruite à vostre Maïesté, & demeurer fermes dans leur obeyssance, on les veut declarer criminels de leze-Majesté, & pource, on extorque des Arrests, & des resolutions du premier Senat de l'Europe pour proceder criminellement contre eux.

Monsieur le Prince au nom de toute la France,
 au

au nom de toute l'Europe, de tous vos amis & alliez: vous demande iustice; voyons si vous la luy pouvez refuser, & si pour des personnes de neant, il faut reietter la voix de Dieu, puis que celle du peuple est ainsi nommée, sa qualité de Prince de vostre sang, & tres-humble subiet vous y oblige.

Les Rois, Sire, ont esté instituez & establis à ceste fin: car laisser la terre à la discretion des hommes, viure sans iustice, c'est à dire sans société, est chose du tout impossible; d'où est venu que les hommes mesmes se sont ordonnez des loix, si nous en croyons nos liures, & les sainctes lettres nous apprennent que les Roys ont esté faits de la main de Dieu pour regir les peuples. Aussi leur office n'est autre que de faire iugement & iustice, (dit S. Hierosme) & deliurer de la main des calomniateurs ceux qui sont opprimez par la force & la puissance.

Je suis (dit vn grand Prince) celuy d'entre les mortels qui a esté agreable & esleu pour représenter les Dieux en terre, arbitre de la vie & de la mort du peuple, & distributeur de la fortune d'vn chacun.

Considerez & meditez ses paroles, Sire, & vous verrez à quoy vous estes obligé. Le Prince (dit Seneque) doit prendre vn soing entier de la chose publique, se charger des bonnes & mauvaises fortunes du peuple, s'oublier soy-mesme pour l'amour de ses suiets, estre importuné de divers messagers, respondre à tous, auoir l'œil sur tant de villes, nations & pro-

uincés, & traualier nuit & iour pour le salut de tous? Qu'est-ce à dire, sinon que la charge du Prince, & son but ne doit estre autre que le salut du Peuple? c'est à dire faire iustice.

Oyez & prenez ce que disoit Tybere au Senat de Rome, & vous iugerez avec quel conscience on vous persuade de mespriser les Parlements; ie vous ay dit plusieurs fois (disoit ce Prince) & le vous dis encore que tout bon & iuste Prince doit servir au Senat, à tous les Cytoïens le plus souvent & tousiours à chacun d'eux en particulier, & ne me represente point de l'auoir dit ainsi, belles paroles dignes d'un grand Monarque, & qui ne peuvent estre prononcées que par un esprit vraiment divin, voila l'entiere instruction d'un Prince, qu'il serue (dit-il) c'est à dire qu'il escoute; qu'il defere au Senat, qu'il croye les bons & fidels Conseillers, qu'il cherche & procure le bien du peuple, & qu'à chacun il face iustice & empesche les oppressions, hors de là il n'y a point de Prince.

Ce que Traian considerant lors qu'il donnoit au Preteur l'espée de iustice, ayant pouuoir de vie & de mort, tenez (luy disoit-il) si ie commande quelque chose avec iustice pour le salut de tous, employez la pour moy, si autrement, vsez en contre moy.

Representez-vous que les Roys ne sont que depositaires de Couronnes, & de fait Adrian l'Empereur avoit coustume de dire qu'il se porteroit à la directiō de la chose publique, comme si l'affaire du peuple

estoit la sienne propre.

Ceste vieille eust bonne grace qui demandant iustice à ce même Empereur, apres plusieurs remises l'aresta tout court, vn iour qu'il alloit à la chasse, & eust la hardiesse de luy dire, rendez iustice, ou ne soyez plus Roy. Mais quels inconueniens & malheurs n'ont point suivis les Princes qui ont desnié la iustice à leurs peuples? Philippes pere d'Alexandre, & Demetrius Poliocertes en ont laissé de beaux exemples à la posterité, au contraire les Royaumes qui ont esté regis par iustice, ont tousiours esté florissans & les Roys heureux qui l'ont maintenüe.

Laiissons les Philippes, les Cefars, les Claudes, les Trajans, & tous ces vieux Romains, iettons les yeux sur la iustice de l'Empereur de Bizance, voyons Tottilla ce fleau de Dieu, de qui les actes de iustice sont si remarquables qu'ils feront rougir de honte les Chrestiens.

Mais nos Roys de France, Charles 8. S. Louis & ses descendans nous en fourniroient de plus frais & de plus rares, si nostre dessein estoit d'en faire vn ramas, il nous suffit de vous dire, que le Royaume n'a esté soustenu de ceste presente main de Dieu, sous le regne mesme du feu Roy vostre Pere, que par les actes de sa Iustice.

Vous Sire, particulierement estes obligé à cette mesme iustice, & quand il n'y auroit autre obligation que le serment qui se fait au Sacre de nos Roys,

c'est chose si importante à vostre salut, & de tout vostre peuple que vostre Maieſté ne s'en pourra iamais delſdire non pas meſme le differer ou conuiuer, ſans vne apprehenſion perpetuelle de la main du Tout-puiſſant.

A l'eſgard des hommes deſquels vous ne releuez en aucune façon, encores y eſtes vous obligé, ſi les paroles des Roys ſont veritables & plaines deſſet, particulièrement à l'endroit de Monsieur le Prince : car ſur les plaintes qu'il vous a faites par ſes lettres des malverſations de *Seſanus* & ſes adherans. Il n'en a eu la ſatisfaction qui eſtoit à deſirer, & dont l'exécution en ſeroit bien plus glorieuſe ſi elle en euſt eſté faiſte ou ſi elle l'eſtoit à preſent ; car qui doute que ce tyran n'ayt abuſé du deuoir de ſa charge, n'ayt ruiné ce Royaume, & n'ait perdu ſa reputation par ſes concuſſions, volleries & trahiſons, en pouuons-nous douter apres la denonciation de Monsieur le Prince qui a offert de la vous iuſtifier, & que le Parlement de Paris demande permiſſion d'y pourvoir ? voudriez-vous enfin refuſer la Juſtice que vous auez promiſe, iurée, & que vous leur deuez ? quoy faudra-il que nous faſſions venir en France vne vieille eſtrangere pour vous dire faiſtes iuſtice, ou ceſſez de regner ?

Votre Parlement & les ſacrées perſonnes qui le compoſent, portent vn ſi grand reſpect aux volontez de vostre Maieſté, que pour vous complaire ils proteſtent ſe décharger du fardeau qu'ils ſupportent, &

contenter

contenter le public, & auroient eux mesmes remis leurs charges a vostre deposition, au premier signe qu'ils en eussent receu de vostre Maiesté, comme ils ont publiquement & particulierement assez de fois déclaré qu'ils sont encores prests de faire à la premiere semonce qui leur en sera faite de sa part.

Ces personnes si saintes & si obeissantes (Sire) que mesme la Reyne reconnoist pour tels ; ces grands homes sacrez tuteurs & depositaires de la Justice, auront-ils changé d'humeur a present ? il n'est pas possible ny croyable qu'ils veulent contredire ce qu'ils vous ont offert, & puis qu'ils se soubmettent à l'examen de la Justice, qu'ils déclarent en particulier & en public vouloir contenter la France, & se demettre de leurs charges ? pourquoy exposera-on vostre Royaume en proye, & le faire deuorer par le feu d'une guerre intestine ?

Guerre qui affoiblit vostre autorité, incommode vostre personne, ruine l'Estat, dissipe vos subiets, & fait dependre de la discretion & de la merci de vos voisins, & de vos ennemis, & tout cela pour maintenir des pestes publiques.

Nous n'avons point encor oublié nos dernieres fureurs civiles, nos compagnes ne sont point encores desgraissees des corps morts quelles ont couverts, nos riuieres, nos fleuves & nos fontaines rougissent encores du sang des François, & voulez vous Sire, que pour vn tyran & ses adherans qui ruinent vostre

Estat nous perissions tous? destourdez destournez ceste malheureuse destinée de la France, soyez Roy & Roy des François.

Decernez, Sire, decernez commissions au Parlement pour informer contre les ennemis domestiques du Royaume, ordonnez lui d'en faire iustice, & nous voila apres tous contans, plus de guerre, plus de troubles, il n'y a que les meschans qui apprehendent la veuë de la iustice, & qui aiment la confusion, car outre l'assurance qu'ils ont d'eschapper, par ce moyen le iugement des hommes, encores ont-ils cét aduantage de pescher en eau trouble, la vie d'un homme de bien doit estre semblable au bastiment de Iulius Drusus, sices gens sont si iustes, & s'ils ont bien vescu qu'apprehendent ils? vne ame nette ne doit rien craindre.

Scipion l'Africain, l'honneur de son age, Scipion Asiaticque, Lutilius & Ciceron iettez eux mesme dans les hazards de la censure, Et pourquoy ces gens ici ne la souffriront il pas?

Mais Sire, voici ce qui les touche, voici le ver qu'il leur ronge l'ame, voici en vn mot le bourreau que sent ce nouuel *Sesanus*, car qui peut ignorer le train de sa vie: que les artifices dont il s'est ferui en Allemagne & en Italie, payant osé bailler des passeports aux ennemis de cest Estat. Mais qui ne sçait la lacheté qu'il fist à l'endroict des allies de la Couronne, les deniers qu'il a volez à la honte & à la perte de

la réputation & de l'honneur de la France, les trahisons qu'il a commises en tant de lieux, & ce qu'il a fait depuis son retour, ses pratiques mesmes, & les pensions qu'il tire tous les ans avec lesquels il a tellement enflé les voilles de son ambition, qu'il medite desia la souveraineté du monde.

Les Garnisons remplies d'estrangers, l'ennemy de la France placé dans vostre chambre & ses partisans en vostre Conseil, & vne infinité d'autres commis que i'obmets, & qui feront representez & iustifiez ailleurs, a esté fait par l'aduis, & par l'auctorité de ce nouuel *Sesanus*, & pour son profit, & qui pourra croire que ses actions si detestables demeurent imprimez, puisque ce sont autant de crimes de lezeMaiesté, si les loix de la France meritent d'estre creuës.

Vostresors ou plustost ceux de la Couronne sont vollez: helas, Louis XIII. grand Prince qu'estoit il necessaire de fatiguer vostre vie, & suer si long temps pour rendre vostre France riche, opulante & redoutable a tout le monde: puisque à present l'on la fait esclave de vos ennemis, pauvre & du tout miserable, tant de millions qu'on a leuez sur vostre pouvre peuple sont esvanouis, *Sesanus* & les siens les possèdent, ils en achètent des Principautez Souueraines, des Marquisats, des Comtez & des Baronnies, les Banques de Venise & d'Allemagne ne sont fournies que des daniars qu'il vous a volez, les Accademies à Paris ne s'entretiennent que de billets & promesses de *Sesanus*.

iouë à trois dez les cent milles pistoles, ne coustent
que le masses à vn seul coup, vn *capo trange vn paroli*
& riparolli, & employez pour la despense de sa garde.

Il estoit bien permis à Pericles d'employer dix mil
escus en la despense de ces comptes, sans acquit, man-
dement ny en dire la cause, parce que sa prud'homie
& sa loyauté estoit cogneuë de la republique, mais
qui ne sçait & connoist l'avarice & la desloyauté de
ce nouuel *Sesanus*.

Aussi est-ce la raison pourquoy la Chambre des
Comptes fort prudemment n'a voulu verifier l'acquit
qui en auoit esté seellé, & qu'elle a protesté de ne le
consentir iamais estant tresveritable que les deniers
de la couronne (ceux-la particulièrement) ne pou-
voient estre enleuez que pour chasser l'ennemy du
milieu du Royaume, suivant l'Arrest qui en fut faict
au Conseil, les Princes & Ducs presens.

Mais dequoy sert-il de faire de beaux arrests en vo-
stre Cour, puisque *Sesanus* les mesprise, ny a aucun
esgard, & passe par dessus tout, c'est arrest est aboly
par autres du tout contraires; la force & la violence
peuvent & osent tout, les loix ny les hommes mesme
ny sçautoient faire resistance, l'argent est enlevé par
les conseils de *Sesanus*.

On rompt les portes, les tonneaux, & les bariques
du tresor sont enlevés, diuertis, dissipées & mangées
auans d'estre distribuées, Sire, il n'est pas licite au
souverain d'abuser des tresors de l'Etat, d'autant que

le Royaume (comme dit Cassiodore) n'est autre chose qu'une republique sous la garde du souverain, ou de fait Pericles fut grièvement repris de ce qu'il avoit dit aux Ambassadeurs des allies qu'ils n'avoient point d'intérêt, à quoy les finances fussent employées.

Si du moins on les avoit fait passer par l'Espagne, ce seroit quelque chose, mais on ne les prend que sous son recepicé, & par des comptans.

Ce n'est pas sans cause, Sire, que ce *Sesannus* entreprend sur vostre auctorité, & si les bons & vieux serviteurs du feu Roy vostre pere qui ont le mieux fait, & qui jusques à present ont maintenu vostre Couronne, sont chassés, les uns menassés, les autres mal traités & banis de la Cour & des affaires, les fautes accusations & les calomnies ne sont point encore esteinctes, il se trouvera encorés ie m'assure quelque nouvelle mendiolle pour attaquer quelque grands Officiers de la Couronne, & faire baillet leur confiscation aux confidens de *Sesannus* quelque Juif ou Maranne qui pourra entreprendre d'empoisonner nos Princes, il a envoyé des billets aux Officiers Souverains pour n'aller plus aux assemblées, comme aussi il a exilé de vos meilleures villes, plusieurs autres bons bourgeois & Citoyens plus affectionnez à vostre service que ne fin

iamais ce coyon, bon Dieu quel siecle est celuy-
 cy ou les bons souffre, & les melchans sont sup-
 portez.

Vostre Parlement en ses remonstrances nous a
 faiët veoir à l'œil & toucher au doigt la dissipa-
 tion de vos deniers, les volleries qui ont esté
 commises, & s'est offert de vous le iustifier, que
 faut-il d'avantage pour conuaincre ce nouuel *Se-
 sanus*.

C'est ce grand corps de iustice qui le vous dir,
 c'est l'oracle de verité qui le vous represente, &
 pour cela on le menace, on luy defend d'aller ren-
 dre iustice, on arrache ses officiers de leur logis
 pour les mettre au liët de la mort.

Mais Sire, que dira ce *Seisanus*, sur la necessité
 de vostre espargne, comment est-ce qu'il couvri-
 ra les emprunts qu'il faiët faire, comment les in-
 terests que vous payez, tandis qu'il iouït du prin-
 cipal de vostre reuenu, on vous menace Sire,
 d'vn reculement des rentes, on nous assure du re-
 tranchement des gaiges des officiers, on propo-
 se diuerses inuentions nouuelles qui sont desia re-
 ceuës en vostre Conseil plusieurs Edicts de nou-
 uelle creation d'office ont esté scelez pres d'estre
 enuoyez en vostre Parlement, les solliciteurs en
 ont minuté les Arrests.

La loy *Clandia* deffendoit aux seruiteurs Ro-
 mains d'auoir aucun vaisseau de mer qui portast

plus de quarante tonneaux, *Quastus* (dit Tite live) *Patribus in decorus visus est*, mais cela n'a point de lieu en France, puis que le vice s'est changé en vertu, & qu'estre homme de bien est deffendu sous le regne de *Sesanus*.

Et cependant en la necessité où vous estes, *Sesanus* ne voit point que nous sçauons que vos fermes sont augmentées de plus du tiers, la despence de vostre Maiesté diminuée de beaucoup, si ce n'est les pensions qu'il a renforcees en faueur de ceux qui trahissent leur ordre & leur maistre, qui se sont departis de la recherche de ses voleries & de ses actions qui le maintiennent & le portent en ses souplesses, à ces nouveaux Conseillers ie dis à ses confidens, auxquels il a fait augmenter des sommes excessiues par chacun an, au moins si vos pensions & vos dons estoient distribuez comme faisoient les Roys de Perse, & de Macedoine, ou comme faisoit celuy d'Egypte vers Aratus, qui auoit l'estat à sa deuotion, cela seroit supportable, mais il les distribue à ses confidans & amis, non à vos seruiteurs.

La passion Sire, ne me faiet point parler, ie n'ay aucun interest en ses affaires, mais la verité guide mes paroles, iamais *Cateline Marius ny Silla*, dont l'histoire Romaine fait mention, ne furent si pernicioeux à l'Empire que ce nouuel *Sesanus* l'est à la France, le Trionvirat ne fit iamais tant de

mal que ce *Sesanus* faict.

Tibere fust merueilleusement blasme de ce qu'il ne fist aucune iustice des plaintes qu'on faisoit contre les vices, des Consuls & Commissaires qu'il auoit establiés Prouinces, au preiudice des ordonnances de Rome, & d'Auguste son predecesseur, & dit l'hystoire que ce fut vn des premiers traits qu'il fit d'vn meschant Prince.

On vous pippe, on vous ruine, on vous trahit, & vous ne voyez pas que ce *Sesanus* vit dans la confusion, comme le poisson dans l'eau trouble, que l'orage & la tempeste de l'Esté est son pot assésuré, que la concorde & la paix est sa ruine, les guerres ciuilles ne sont iamais vtilles qu'aux meschans, qui ne craignent pas moins la paix que la peste, ayant en tout euenement deuant les yeux la resolution de Catilina, lequel disoit qu'il n'auoit peu esteindre par eau le feu pris en sa maison, mais l'esteindroit en la ruinant, & de faict, il fust à vn poinct pres de perdre l'Estat, si le conseil de Ciceron n'y eust remedié.

La presence des Princes est vn Soleil bien clair, ou bien fort contre les brouillards de ce *Sesanus*, il a beau espouffir les nubes impures d'orgueil, d'auarice, d'iniustice d'ambition, de tyrannie, les rayons de ses Soleils dissipent tout, les fondent en eau liquide & leur font rendre gorge, c'est ce que ce *Sesanus* craint, c'est la meditation qui l'occupe,

pe, c'est en vn mot ou tous les ressorts de son esprit sont bandez, & vous n'en ferez point iustice à la France qui la vous demande avec larmes de sang?

Parthenius fut lapidé pour auoir conseillé le Roy Theodebert de charger ses subiets de nouueaux subides.

George Prescheron fut executé à mort pour mesme subiect, & fit perdre Henry de Suede, duquel il estoit Gouverneur.

Ce nouuel *Sesanus* fait pis que cela, & toutesfois il vit encore, n'en ferez vous point iustice, Sire, pour le moins souffrez que nous la faisons faire. Si Commene a peu faire chastier Theodore son fauori, pour auoir destourné vn bœuf seulement qui appartenoit à vn sien pauvre subiect, que ferez vous à ce nouuel *Sesanus* qui vous volle, & volle vostre peuple.

Voyez l'industrie de ce nouuel *Sesanus*, pour s'excuser & se couvrir, y fait chastier d'vnemain, mais pour garder qu'on ne le descouure il recompense de l'autre, & cela faict il, depuis la plainte & les remonstrances du Parlement, afin que ceux qui ont traicté avec

luy pour semblables affaires, se contiennent en silence & en respect.

Mais qu'est-ce que ce *Sesanus* ne faict point aux finances, à ce petit Conseil qu'il nomme direction priuée, il n'y a affaire qui se traicte dont il ne fait argent tous les partis & vos formes luy sont tributaires, il ny a Partisan ny Fermier qui ne luy doiue hommage: ie dis vne rente annuelle, & son droict d'en tre ceux mesme qui poursuiuent quelque remboursement au payement des debtes, sont contraincts d'en traicter & composer, tousiours rabais & desdommagement en voye: tousiours folles, encheres chez luy, tousiours Partisans à ses trousses, pour auoir des diminutions de charges, ou bien des augmentations de nouveaux droicts & de plus longues années iamais, rien à vostre profit.

Cesar en son premier consulat fit rabaisser les encheres des Fermiers apres auoir eu les mains graissees, Metellus tribun du peuple osta le peage d'Italie, moyennant de l'argent qu'on luy donna, Pericles fit distribution en Athenes de quelques deniers qui reuenoient de bon des finances en faueur de ses fauoris.

Sire, voila le train de ce *Sesanus*.

Digne & celebre Senat qui a tesmoigné à la posterité que le seul seruice du Roy & le zele de la iustice est son but & son Phare, sans apprehender ny craindre les fulminations de ce nouuel *Sesanus*, les menées ny mesme ses recompenses, digne encore vn coup que la posterité en sçache l'histoire sur vne table d'eternité l'integrité de ce Senat & de ses deputez soit grauée en lettre d'or.

Qu'on entre donc plus en admiration des benefices qu'il se donne & qu'il achepte tous les iours, Il possède & les sienstoutes les principales & plus importantes charges, tout passe par ses mains, tout est faict pour luy, & afin que vostre Maiesté sçache que ce ne sont point calomnies, mais veritez essentielles & subsistantes quant elle aura eu agreable de pourueoir sur les plaintes du Parlement de permettre d'en estre informé, on les verifera.

O que celuy est digne de louange immortelle, que premier amis au iour la verité cachée dans le puis Democrite, c'est à dire ceste confusion, qui vray Prophete nous

a denoncé les mal-heurs que nous voyons à
 present en la France ; qui en vray & fidel
 François en a baillé les aduis & les remedes
 aux assemblées , mais nous aymons mieux
 nous perdre que desplaire à ce nouuel *Sesanus* , &
 seruir nostre Roy , ce n'est plus le
 siecle de recompenseny des honneurs , nous
 mesprisons ce qu'il faudroit cherir par de-
 uoir , & ce que nos peres auroient honoré
 & recherché dans les coings les plus esloi-
 gnez de la terre , & à l'imitation du pour-
 ceau d'Epicure , nous aymons mieux crou-
 pir dans la boüe de la confusion & du de-
 fordre qu'auoir la gloire de bien seruir &
 de bien faire , ce nouuel *Sesanus* le voit
 bien , Sire , il le sçait bien , c'est pourquoy
 il continuë.

C'est pourquoy il esloigne Monsieur le
 Prince , & les autres Princes , Ducs & Pairs
 qui sont avec luy , les veut perdre , les faire
 declarer criminels , les veut rendre odieux à
 vostre Maïesté & au peuple , deffend aux vil-
 les de leur donner entrée ny passage , escrit au
 Parlement des colomnies au lieu de la verité
 de leurs actions , & ne trouuerons nous point

en France quelque *Florus ou sacronis*, pour
resister aux oppressions que les François souf-
frent.

Les assassins qui se commettent sont au-
torisez de *Sesanus*, point de iustice, mais
toutes mauuaises entreprises.

Les Princes & les peuples sont plus mal trai-
ctez en France que n'a esté Rome Germanicus
sous Thibere, les conseils de ce nouueau
Sesanus, tendant à l'extirpation de la mai-
son de France, à la ruine de la Iustice & de
tout l'Estat.

La force de l'Estat n'est plus en vostre dis-
position, vos finances & vos canons sont es
mains de ce *Sesanus*, l'ordonnance de ses
confidans, vos places fortes, ou ruinees, ou
consignées entre les mains des estrangers ou
les Princes esloignez mal traictez, & courus,
la iustice mesprisée & foullee, la Noblesse
offensée, le peuple ruiné & irrité, les villes
mescontentes & mutinées, les charges milli-
taires, celles de iudicatures & des finances
venduës & rauies à l'honneur, à la vertu, au
seruice, au merite, & à la capacité, nos voi-
sins amis & alliez fort mal affectionnez, no-

stre ennemi est dedans vostre Royaume; voyez Sire, l'Estat ou vous estes, le peu de moyen que vous auez de resister, & le precipice dans lequel ce *Sesanus*, vous porte, car il est cause de nostre mal ! hélas que nous auons bien a apprehender le temps d'Achæus Roy des Lydiens, celuy de Denis le Icune, voire celuy de Theodoric Roy de France; mais bon Dieu destournez ce malheur.

Vn grand Prince de l'antiquité demandoit à vn Philosophe de son siecle, les moyens de remettre vn Estat qui estoit sur le penchant de sa ruine, apprit que c'estoit en faisant iustice recompensant la vertu & chastiant le vice.

Toute la France, Sire, vous presente les maux que ce nouuel *Sesanus* a fait en vostre Estat, vous en demande iustice, & vous auez veu que l'Empire de Rome n'a peu euitier sa cheute que par la mort de *Sesanus* Romain, que V. M. donc face iustice, & ne souffre point l'embrasement d'vn des plus beaux Royaumes du monde, pour maintenir contre les loix de l'Estat, la tyrannie que ce nouuel *Sesanus* & les autres mauuais François exercent sur le peuple.

F I N.

